

〔三代實錄四清和〕貞觀二年閏十月廿三日己巳勅從四位下行文章博士兼播磨權守菅原朝臣是善正五位下守權左中辨兼行式部少輔大枝朝臣音人正五位下守右中辨藤原朝臣冬緒從五位上行大學博士大春日朝臣雄繼從五位下守主計頭兼行木工助算博士有宗宿禰益門等曰今年一章十九年准據先例當有朔旦冬至而曆博士眞野麻呂等所上曆日冬至在十一月二日若於經史有可進退之理乎宜議而奏之是善等議曰謹案眞野麻呂所執以爲依日分小餘不足不得合朔論之曆術理若當然但案曆經注云月行遲疾曆則有大大小小以日行盈縮增損之云々當察加時早晚隨其所近而進退之使不過大大小小其正月朔若有交加時正見者消息前後一兩月以定大小令虧在晦者以此言之既有進退之理而今當年曆八月大九月小十月大閏十月小然則以一小小爲大自得朔旦冬至夫朔旦冬至者曆數之所始帝王之休祥既云避凶而在晦何不逐吉以退朔昔唐太宗貞觀十四年有閏十月即得朔旦冬至太史令傅仁均以癸亥爲朔旦冬至而宣義郎李淳風案古曆分日以爲甲子宜在朔旦詔下公卿及諸有識於是國子祭酒孔穎達等十有四人尙書八座請從淳風議有詔可之雖然至於後年不見晷耀之愆爰知一日進退未足爲妨又尙書百釋云頻大消之案其意義每至章部之歲必欲令得朔旦冬至故頻置大月至於三四夫大大小小者曆術之常法況今唯置七七類聚史作二大既得合朔乎又勅從五位下行曆博士兼備後介大春日朝臣眞野麻呂外從五位下行陰陽助兼權陰陽博士笠朝臣名高等曰今諸有識等僉議云今年可置朔旦冬至若依此說逐吉置朔者於後年曆得節氣不錯繆歟眞野麻呂等奏言謹檢術法無依吉進退之文仍今年不置朔旦冬至但依群臣議置之可無弦望晦○晦原作朔據政事要略改之差於是詔從是善等之議焉廿五日辛未宣詔百官及五畿七道諸國云今年當有朔旦冬至而曆家偏依日分不足置於二日今稽之故實既有改定之理宜改閏十月爲大即以十一月二日丁丑爲朔旦冬至

〔扶桑略記二十三裏書〕延喜十七年二月廿日己亥兵衛志多治有行與曆博士等論可无朔旦冬至之由